

捐毒國王治衍敦谷去長安九千八百六十里戶三百八十口千一百勝兵五百人東至都護治所二千八百六十一里至疏勒南與葱領屬師古曰屬聯也音之欲反無人民西上葱領則休循也西北至大宛千三十里北與烏孫接衣服類烏孫隨水草依葱領本塞種也

莎車國王治莎車城去長安九千九百五十里戶二千三百三十九口萬六千三百七十三勝兵三千四十九人輔國侯左右將左右騎君備西夜君各一人都尉二人譯長四人東北至都護治所四千七百四十六里西至疏勒五百六十里西南至蒲犁七百四十里有鐵山